

Komisaun Ekonomia no Dezenvolvimentu

RELATORIU VIZITA FISKALIZASAUN IHA MUNISIPIU ERMERA

I. Introdusaun

1.1. Enkuadramentu Legal

Komisaun Ekonomia no Dezenvolvimentu, Parlamentu Nasional halao vizita fiskalizasaun bazeia ba art.^o 92^o, art.^o 95^o, n.^o 3 alínea e), kombinadu ho art.^o 145^o n.^o 3) husi Konstituisaun RDTL, no mos bazeia ba art.^o 35^o alínea c), kominadu ho art.^o 79^o alínea f) husi Rejimentu Parlamentu Nasional.

Vizita ne'e bazeia ba planu atividade ba tinan 2018, ne'ebe koalia kona ba vizita lokal no mos bazeia ba deliberaun ne'ebe Komisaun foti iha loron 26 Setembru 2018 no iha loron 03 Outubru 2018, Komisaun hato'o pedidu autorizasaun ba Nai Prezidente Parlamentu Nasional no tuir mai hetan despachu husi Nai Prezidente Parlamentu Nasional iha loron 4 Outubru 2018.

Haktuir ba despachu refere, iha loron 24-26 Outubru 2018, Komisaun realiza vizita fiskalizasaun ba iha Munisipiu Ermera ho intensaun atu hare no rona diretamente rezultadu husi implementasaun projetu sira iha Munisipiu refere.

1.2. Area Fiskalizasaun

Delegasaun halo fiskalizasaun ba area ne'ebe mak kabe ba kompetensia Komisaun Ekonomia no Dezenvolvimentu nian, hanesan: MAP, SEFOPE, MTCI, Ambiente no Kooperativa, maibe, Komisaun sei ba hare área sira ne'ebe identifika ona hanesan tuir mai ne'e:

Empresa CCT iha Suku Estadu, Empresa Kafe Rekmel iha Suku Eraulo, Fini Karau iha Suku Estadu, Suku Goulolo no Suku Eraulo, Kanal Irrigasaun iha Suku Lauala, Sentru Plantas Industria iha Suku Fatuquero, Empresa CCT iha Suku Lihu no Empresa Grasia iha Suku Railaco-Leten.

1.3. Métodu Fiskalizasaun

Métodu ne'ebe Komisaun uza iha fiskalizasaun ne'e mak liu husi dialogu ho lideransa lokal sira, liu husi reuniaun. Depois reuniaun membru Komisaun ba terenu hodi halo observasaun direta ba konstrusaun no mos koalia direta ho populasaun sira. Depois observasaun Komisaun reuniaun hodi halo avaliasaun ba dados ne'ebe iha molok aprova. Ita bele komprende métodu hirak ne'e hanesan tuir mai ne'e:

Komisaun Ekonomia no Dezenvolvimentu

1. *Enkontru:*

Delegasaun hasoru malu ho reprezentante Autoridade Munisipiu Ermera, reprezentate MAP (Ministerio Agricultura e Pescas) Munisipiu, Diretor SEFOPE, Oficial MTCI no Fokal Poin Ambiente.

2. *Observasaun direta:*

Hare projetu fiziku, koalia ho agrikultor sira, rona comunidade nia lamentasoens no trabalhador sira nia difikuldades.

3. *Análiza:*

Cross check dados ne'ebe hetan husi vizita, liga ba ezekusaun Orsamentu no dados ne'ebe mai husi Governu, hodi hatene kona ba efisiensia no efikasia ezekusaun orsamentu, atu hatene kona ba balansu entre despezas no benefisiariu sira, no atu sukat Meta polítika kona ba retornu ekonómiku.

1.4. **Objetivu Vizita**

Objetivu husi vizita fiskalizasaun ne'e:

1. Atu hare efisiensia no efikasia iha ezekusaun OJE bazeia ba kumprimentu lei no kualidade obra;
2. Rejista no identifika problema ne'ebe iha, relasiona ho ezekusaun Orsamentu (balansu ba benefisiariu sira no osan ne'ebe gasta);
3. Atu hare diretamente prosesu no progressu konstrusaun husi projetu no polítika implementasaun projetu.

1.5. **Delegasaun**

Kompozisaun Deputadus no Funsionariu sira ne'ebe hala'o vizita:

- | | |
|---------------------------------------|-----------------|
| 1. Deputada Virgínia Ana Belo | Xefe Delegasaun |
| 2. Deputadu Ricardo Batista | Membro |
| 3. Deputadu José Virgílio R. Ferreira | Membro |
| 4. Deputada Regina Freitas | Membro |
| 5. Deputadu Antoninho Bianco | Membro |
| 6. Deputadu António do Santos ``55`` | Membro |

Komisaun Ekonomia no Dezenvolvimentu

7. Deputadu Alexandrino C. da Cruz Membro
8. Deputadu Mariano Assanami Sabino Membro
9. Teknikus, Motoristas no Jornalistas

II. Rezultadu Enkontru

2.1. Informasaun husi Administrasaun

Antes dezloka ba terenu Komisaun halo reuniaun ho Diretor Agencia Fiskalizaun ne'ebe representante Prezidente Autoridade Munisipiu Ermera no kometiva hodi obter informasaun jeral kona ba implementasaun projetu sira ne'ebé realiza iha Munisipiu Ermera, liu-liu projetu sira ne'ebé kabe ba kompetensia Komisaun D no informasaun importante seluk.

Sorumutu entre delegasaun Komisaun D no loke ho liafuan bemvindu husi Diretor Agencia Fiskalizaun, iha intrudusaun haktuir katak Prezidente Autoridade Munisipiu ba tuir hela reuniaun iha Dili, iha Komisaun Revizasaun Orsamentu hodi defende planu orsamentu munisipiu nian ba tinan 2019, ho nune'e delega atan hau atu representa Prezidente Autoridade hamutuk ho diresaun relevante sira hodi hasoru malu ho distintus Deputadu sira husi Komisaun D, Parlamentu Nasional ne'ebe mak ohin loron mai halo fiskalizaun iha Munisipiu Ermera.

Iha sorumutu ne'e, Prezidente Komisaun D, Deputada Virgínia Ana Belo, nudar xefe delegasaun, sita kona ba objetivu vizita fiskalizaun iha Munisipiu Ermera, ne'ebé mak atu rona no hare direktamente prosesu no rezultadu implementasaun husi Orsamentu Jeral Estado ne'ebé Parlamentu Nasional aprova kada tinan, liu-liu nia benefisiu ba comunidade em jeral.

Hafoin tuir mai, Diretor Agencia Fiskalizaun fo tempu direta ba iha diresaun munisipal sira hodi relata atividade sira ne'ebe mak kada diresaun halao iha Munisipiu Ermera, hanesan tuir mai:

2.1.1. MTCI

Responsável MTCI ba iha Munisipiu Ermera informa katak iha governu anterior MCI iha diresaun tolu mak destaka iha Munisipiu Ermera hanesan Diresaun Kooperativa, Diresaun Komersiu Internu no Diresaun Regulasaun Komersial. Iha Governu dala walu nian Diresaun Kooperativa hamrik mesak ona nudar Sekretariu Estado ida. Ho nune'e servisu ne'ebe diresaun sira ne'e halao mos la hanesan:

Komisaun Ekonomia no Dezenvolvimentu

- **Diresaun Regulasau Komersial** ho nia atividade mak halo levantamentu dadus ba presu sasan sira hanesan material konstrusaun, necessidade basiku, produktu lokal, no kombustivel.
- **Diresaun Komersiu Internu** ho nia atividade mak fo licença komersial ba empresa sira.
- **Jestaun Merkadu**

Servisu ne'ebe diresaun Jestaun Merkadu halao iha munisipiu mak halo levantamentu no identifikasaun ba merkadu sira ne'ebe existe iha munisipiu Ermera. Merkadu ne'ebe identifika ona hamutuk merkadu 5, iha Postu Administrativu 5 (lima), iha Munisipiu Ermera. Orsamentu operacional ne'ebe aloka ba diresaun ida ne'e, liu-liu ba iha jestaun merkadu iha tinan 2017 ho total \$5.000 dolar amerikanu no ezekuta deit \$1.500 dolar amerikanu ba iha atividade identifikasaun merkadu no inklui halo mos atividade sensibilizasaun ba decreto-lei n.º 52/2016 kona ba publicidade no osan restu fila fali ba kofre estadu.

- **Turismu**

Área turismu ne'ebe identifika iha Munisipiu Ermera mak hanesan be'e kor hitu iha Batu-Manu no Mota Bandeira iha Postu Administrativu Atsabe, Be'e Manas iha Postu Administrativu Hatolia, Fatuk Ain Sama Fatin Avo sira nian iha tempu beiala iha Aldeia Hatuhei, Postu Administrativu Lete-foho no seluk tan ne'ebe seidak identifika hotu, tamba problema mak la iha transporte adekua no orsamentu operacional.

2.1.2. Ambiente

Diresaun Ambiente iha governu anterior tutela ba ministériu ida deit mak Ministeriu Komesiu Industria no Ambiente. Servisu ne'ebe halo durante ne'e mak hanesan halo monitorizasaun no sensibilizasaun. Orsamentu ba atividade monitorizasaun mos sentralizadu iha nasional no apoiu ho motorizada rua, maibe motorizada rua ne'e nia kondisaun a'at hotu.

Servisu sensibilizasaun ambiental ne'ebe halo ba iha suku sira durante ne'e kobre deit ba iha suku 12 no suku 40 la kobre tamba problema mak la iha transporte no orsamentu, wainhira atu realiza atividade sensibilizasaun ambiental aproveita deit transporte husi ONG internasional sira hanesan ILO no UNDP ne'ebe halo sira nia programa konvida ami ba hodi fahe netik informasaun ambiente nian ba comunidade sira.

2.1.3. Kooperativa

Komisaun Ekonomia no Dezenvolvimentu

Diresaun Kooperativa ho nia atividade mak halo sensibilizasaun ba decretu lei n.º 16/2004 kona ba grupu sira ne'ebe hakarak hari'i kooperativa, halo akompanhamentu no monitorizasaun ba kooperativa sira ne'ebe registu ona iha munisipiu. Total kooperetativa iha 7 mak registu ona, hanesan kooperativa kreditu União 1, kooperativa agrikola 2 no kooperativa multi-sektorial 4.

2.1.4. SEFOPE

Diretor SEFOPE Munisipiu Ermera fo sai katak atividade ne'ebe halao mak halo registu ba joven sira ne'ebe buka servisu no formasaun. Iha 2018 ne'e, hahu husi janeiru to'o outubru halo registu ba ema ne'ebe buka servisu ho total 1.603, kompustu husi feto hamutuk 420 no mane 1.123. Husi numeru ida ne'e, halo teste no nain 200 mak liu hodi ba servisu iha Australia.

Simu mos keixa husi trabalhador sira ne'ebe servisu iha empresa lokal no empres internasional sira. Hahu husi janeiru to'o outubru tinan ne'e iha keixa 7 no konsege resolve keixa 6 no keixa 1 labele resolve no haruka ba iha SEFOPE nasional hodi resolve.

Halo mos inspeksaun ba empresa lokal no internasional hamutuk 28, no ba trabalhador sira hamutuk 320 no hetan duni irregularidade balun ne'e empresa sira viola hanesan pagamentu salariu minimu ba trabalhador la to'o tuir lei trabalhu ne'ebe determina ona no mos empresa sira la atribui ekipamentus seguransa ba trabalhador sira iha tempu halo hela servisu. Husi irregularidade hirak ne'e empresa selu multa ba estadu ho total \$4.875 dólares amerikanu.

Programa estrada rural iha projetu estrada 1 ho distancia 3 kilometru iha Suku Ponilala halo husi empresa Kolimeta Unipessoal Lda no la konsege finaliza 100%, tamba kapasidade financeira limitadu. Ho nune'e progresu fisiku atinji deit 83% no hela 17% sei loke fali konkursu ba empresa seluk hodi bele kompleta projetu ne'e.

Programa auto emprego ne'ebe mak orienta ba kriaun servisu ba joven sira ne'ebe remata ona formasaun ka kursu iha sentru formasaun sira, SEFOPE munisipiu fasilita hato'o ona proposta ba SEFOPE nasional hodi apoiu ekipamentu sira hanesan ekipamentu karpintaria no seluk tan hodi joven sira bele kria rasik servisu ba sira nia a'an.

Sentru formasaun iha munisipiu Ermera iha sentru formasaun ida ne'ebe akreditadu mak STVJ. Sentru formasaun ida ne'e fo formasaun iha area administrasaun no hospitalidade iha Munisipiu Ermera, maibe hare ba nesesidade merkadu, ho nune'e iha hanoin atu muda area formasaun administrasaun ba area konstrusaun, maibe ida ne'e presiza apoiu husi estadu hodi bele realiza.

Komisaun Ekonomia no Dezenvolvimentu

Além de ne'e, propoen ona atu halo formasaun lian Korea maibe seidak iha resposta husi parte Governu.

2.1.5. Agrikultura

Reprezentate Diretor Agrikultura hato'o katak atividade ne'ebe halao durante ne'e iha Munisipiu Ermera mak hanesan fila rai gratuita lao hela, maibe comunidade sira mak ateste rasik kombustivel ba tratores hodi uza ba fila rai, tamba durante ne'e lao ho duodécimo la iha orsamentu ba kombustivel.

▪ Trator

Tuir informasaun husi Diresaun Agrikultura Munisipiu Ermera, tratores ne'ebe distribui ba Munisipiu Ermera ho total 13 (tratores bo'ot) no husi total ne'e trator 2 mak la funsiona hela 11 tratores. Husi total ne'e koloka tratores 2 iha Sare, Postu Administrativu Hatolia no tratores 9 destakadu iha Gleno hodi atende ba pedidu husi agrikultor sira, maibe agora tratores hirak ne'e iha balun nia pesa a'at hela.

▪ Hand Trator

Hand trator ne'ebe aloka ba iha Munisipiu Ermera ho total 42 no distribui hotu ba iha grupu agrikultor sira hodi utiliza ba fila rai.

▪ Makina Dulas Kafé

Makina dulas café ne'ebe aloka ba iha Munisipiu Ermera hamutuk 154 no distribui hotu ba comunidade sira.

▪ Rehabilitasaun no Reflorestasaun

Tuir informasaun husi diresaun Agrikultura Munisipiu Ermera, katak atividade rehabilitasaun no reflorestasaun ba kafé halo ona kuaze 400 hektares ba plantasaun kafe comunidade sira nian.

▪ Projetu fisiku

Kona ba projetu fisiku, tuir informasaun husi diresaun Agrikultura Munisipiu Ermera katak iha tinan 2017 iha projetu 3, maibe la implementa tamba lao hela ho orsamentu duodécimo ho nune'e apresenta foun fali ba iha planu orsamentu 2019.

Komisaun Ekonomia no Dezenvolvimentu

▪ Estensionista

Total estensionista nebe'e destaka iha Munisipiu Ermera hamutuk ema nain 32. Ida ne'e kontradis ho dadus husi livru n.º 3-B OJE 2017 ne'ebe estipula katak total estensionista no não estensionista iha Munisipiu Ermera hamutuk ema nain 81.

Estensionista nain 32 ne'e seidak bele kobre suku hotu, ezemplu Postu Administrativu Atsabe iha suku 12, maibe iha deit estensionista nain 2 ne'ebe toma konta prekore ba suku 12 ne'e.

2.1.6. Dasafios/Problemas

Desafios sira ne'ebe diresaun sira hasoru iha sira nia servisu lor-loron kuaze hanesan mak la iha transporte no la iha orsamentu operacional hodi facilita sira nia servisu hanesan monitorizasaun no sensibilizasaun iha terenu, alem de ne'e menus rekursu humanus ba iha kada diresaun sira, tamba iha diresaun sira ne'e iha deit pessoal ne'ebe kategoria kuadru permanente nain ida, hanesan SEFOPE, Kooperativa no Ambiente.

Diretor ba Diresaun Jestaun Merkadu no Turismu mos fo sai katak bazeia ba decreto-lei n.º 9/2017 hodi kria fali diresaun foun hanesaun temi ona iha leten, hodi tau matan ba área ambiente, Merkadu no Turismu. Hafoin implementa tiha decreto-lei ida ne'e no hetan nomeasaun ba kargu nudar direktor Jestaun Merkadu no Turismu no halao ona servisu durante tinan ida, maibe seidak hetan diretu ba regalias sira seluk.



Enkontru iha salaun Admnistrasaun Munisipiu Ermera, (24/10/2018)

III. Rezultadu Vizita Terenu

3.1. Vizita Empresa Cooperativa Café Timor (CCT), iha Suku Estadu

Komisaun Ekonomia no Dezenvolvimentu

Empresa CCT hari'i iha Suku Estadu desde 1993 to'o mai agora la iha licença ambiental. Atividade husi empresa ida ne'e mak hanesan sosa kafe kulit mean (tasak) no procesa sai ba kulit mutin. Husi kafe kulit mean ne'ebe processa ba kulit mutin mak hamosu dois liu husi kafe nia be'en no kulit mean ne'ebe fo impaktu direta no indireta ba populasaun sira ne'ebe hela besik iha fatin neba no mos populasaun ne'ebe mak konsumu be'e mota, tamba kafe nia be'en kanaliza ba iha mota. Tuir informasaun ne'ebe hato'o husi diresaun Ambiente Munisipiu Ermera, iha suku 5 mak sai afeitadu ba iha empresa ida ne'e nia atividade hanesan Suku Eraulo. Suku Goulolo, suku Estadu, suku Remerhei no Suku Limea-Sorin Balu.

Tuir observasaun Komisaun nian nota katak kolam ne'ebe empresa prepara hodi akumulula kafe be'en iha kolam 5, maibe la halo limpeza ba kolam hirak ne'e, entaun iha tempu udan kafe nia be'en restu ne'ebe iha sei kontinua dois nafatin.



Vizita maquina dulas kafe no kolam kafe ben iha CCT Suku Estadu, (25/10/2018)



Vizita ba kolam kafe ben, iha CCT Suku Estadu, (25/10/2018)

Komisaun Ekonomia no Dezenvolvimentu

Além de atividade ne'ebe temi ona iha leten, atividade seluk ne'ebe empresa ne'e halo ba iha agrikultor sira mak halo rehabilitasaun ba kafe sira ne'ebe kategoria tuan ona.



Vizita kafe ne'ebe hetan rehabilitasaun husi empresa CCT Estadu, iha Suku Goulolo, (25/10/2018)

3.2. Vizita Empresa Kafe Rekmel, iha Suku Eraulo

Empresa ida ne'e lokaliza iha Suku Eraulo ho atividade hanesan sosa kafe kulit mean (tasak) hodi procesa sai ba kafé kulit mutin ne'ebe la iha licensa ambiental desde hari'i to'o mai agora. Tuir observasaun Komisaun nian katak la iha tenki ou kolam reservatório ba kafé be'en, maibe husik direta ba iha mota hodi fo impaktu direta no indireta ba saúde populasaun sira, inklui mos animal sira mate hotu.



Vizita Empresa Kafe Rekmel, iha Suku Eraulo, (25/10/2018)

3.3. Vizita Empresa Cooperativa Café Timor (CCT), iha Suku Lihu

Empresa ida ne'e hari'i iha 2010 ho atividade hanesan sosa kafe tasak hodi processa sai ba kafé kulit mutin.

Komisaun Ekonomia no Dezenvolvimentu

Tuir obsevasaun Komisaun nian katak la iha jestaun diak ba iha kafe nia be´en, tamba kolam ne´ebe prepara hodi simu kafe be´en hamutuk 3 no la iha jestaun diak ba iha kolam ida ikus liu, tamba kafé nia be´en ne´ebe akumula iha kolam ida ne´e dois direta ba iha populasaun sira ne´ebe hela besik iha fatin neba.



Vizita Empresa Cooperativa Café Timor (CCT), iha Suku Lihu, (25/10/2018)

3.4. Vizita Empresa Grasia, iha Suku Railaco-Leten

Tuir informasaun ne´ebe hato´o husi Jerente katak empresa ida ne´e hari´i ho inesiativa rasik no atividade ne´ebe empresa ne´e iha mak halo kriasaun no produsaun manu. Total manu ne´ebe iha hamutuk 94.000 no loron ida manu sira tolun hamutuk 94.000.

Bazeia ba observasaun Komisaun nian katak empresa ne´e la iha jestaun diak ba iha manu ten no husik direta iha rai no provoka dois.



Vizita ba fatin kriasaun no produsaun manu iha Suku Railaku-Leten, (25/10/2018)

3.5. Vizita Karau Fini, iha Suku Estadu no Suku Eraulo

Komisaun Ekonomia no Dezenvolvimentu

Tuir informasaun ne'ebe hato'o husi ajente pekuaria Munisipiu Ermera katak programa ba fini karau ne'e iha planu inisiu husi Ex-Vice-Ministru Agrikultura no Peskas, Sr. Marcos da Cruz no Ex-Sekretariu Estadu Valentino Barrela atu sosa karau husi Austrália ho programa ``Karau Susuben``, maibe altura neba la konsege importa karau mai, tamba tuir informasaun ne'ebe sira rona katak iha problema entre empresa Timoroan no empresa Australiana ne'ebe atu importa karau mai Timor-Leste, maibe preparasaun husi grupu beneficiariu sira ba programa ne'e hahu iha tinan 2013 ho kuda du'ut aihan karau susuben iha Suku Eraulo, Suku Goulolo no Suku Estadu ho orsamentu ne'be gasta hamutuk \$30 mil dólares amerikanu no iha tinan 2014 prepra mos karau luhan hamutuk unidade 50 ho orsamentu ne'ebe gasta hamutuk \$30 mil dólares amerikanu. Ho nune'e, iha VI governu, liu husi Ministru Agrikultura no Peskas, Sr. Estanislau Aleixo da Silva muda fali programa karau susuben ba fali programa karau fini hodi distribui karau ba grupu beneficiário sira ho total 100 cabeças ba iha suku 4, hanesan: Suku Goulolo ditribui karau 18 cabeças, Suku Eraulo distribui karau 50 cabeças, Suku Estadu distribui karau 30 cabeças no Suku Humboe distribui karau 2 cabeças. Husi total karau ne'ebe temi ona iha leten, iha 27 cabeças mak mate hela 73 cabeças mak sei moris.

Kona ba karau sira ne'ebe mate ne'e, tamba la adapta ho iklima husi iklima manas mai fali iha iklima malirin, tamba karau hirak ne'e sosa iha Manatuto no Atabae ne'ebe mak ho iklima manas, alem de iklima, du'ut aihan karau nian mo'os menus, liu-liu iha tempu bailoron, tamba fatin sira ne'ebe mak grupu sira kuda du'ut aihan karau nian ne'e depende ba iha tempu udan.

Tuir observasaun Komisaun nian hare'e katak karau sira ne'e iha duni no balun iha ona oan no du'ut ne'ebe grupu sira kuda la to'o atu respode iha tempu bailoron, ho nune'e grupu sira lao ain ba buka no halibur hamutuk hodi lori mai fo han ba karau.



Vizita grupu hakiak karau fini iha Suku Eraulo, (25/10/2018)

Komisaun Ekonomia no Dezenvolvimentu

3.6. Vizita Kanal Irrigasaun, iha Suku Lauala

Kanal irrigasaun ne'e, konstrui iha julhu 2012 no finaliza iha Dezembru 2012 ho naruk 3 quilómetro. Empresa ne'ebe responsável ba projetu ida ne'e mak empresa Levir Unipessoal Lda. Orsamentu ne'ebe aloka ba projetu ne'e ho total \$84 mil no empresa hetan ona pagamentu \$46 mil no falta \$38 mil mak seidak pagamentu husi governu.

Tuir informasaun ne'ebe hato'o husi diresaun Agrikultura Munisipiu Ermera katak obra ne'e foin mak entrega la liu lora ida mota mai sobu keda iha parte intake nian kuaze 500 metrus, hodi



nun'e implika ba iha natar hamutuk hektares 60 mak sai abandonadu durante tinan lima ona la halo natar.

Vizita kanal irrigasaun ne'ebe mota sobu, iha Suku Lauala iha tinan 2012, (25/10/2018)

3.7. Vizita sentru viverus Suku Fatuquero

Sentru viverus iha Suku Fatuquero, nia kuantidade menus, tamba distribui ona ba Komunitade sira iha munisipiu Ermera, no atu distribui ba munisipiu Aileu no Liquisa, maibe diresaun ne'e hasoru hela problema mak laiha transporte ne'ebe bele fasilita transportasaun viverus hirak ne'e. Viverus hirak ne'e mak hanesan Ai mahon samtuku, Ai kakeu, ai kafe no Cengek.



Komisaun Ekonomia no Dezenvolvimentu

Vizita fatin plantas industria iha Suku Fatuquero, (25/10/2018)

IV. Konluzaun no Rekomendasaun

4.1. Konkluzau

- a. Funsionariu sira ne'ebe representa ministeriu sira hanesan SEFOPE, Ambiente, Kooperativa no MTCI iha Munisipiu Ermera sei falta facilidades no equipamentus hodi apoiu sira nia servisu lor-loron.
- b. Kanal irrigasaun Lauala durante tinan lima ona la funsiona ho diak, tamba mota sobu estraga hodi nune'e natar kuaze hektares 60 sai abandonadu.
- c. Empresa CCT Suku Estadu, Empresa CCT Suku Lihu-Railaco no Empresa Rekmel Suku Eraulo la halo jestaun ne'ebe diak ba iha kafe be'en hodi hamosu dois ne'ebe fo impaktu direta ba iha populasaun sira ne'ebe hela besik iha area hirak refere.
- d. Plantasaun Kafe nebe iha Suku Goulolo ne'ebe hetan rehabilitasaun husi empresa CCT ba kafe nebe tuan ona.
- e. Empresa Grasia ho atividade hanesan kriasaun no produsaun manu iha Suku Railaco-Leten la iha jestaun diak ba iha manu ten no husik hela iha rai, wainhira konsumidor sira ba sosa ka visitante sira ba visita sempre horon dois, no mos populasaun sira ne'ebe hela besik iha area neba la menta tamba dala ruma empresa husik manu ten direta ba iha mota ne'ebe mak populasaun sira konsumu hela lor-loron.
- f. Estensionista ne'ebe destaka iha Munisipiu Ermera la suficiente atu kobre suku hotu. Ezemplu Postu Administrativu Atsabe iha suku 12 maibe estensionista nain 2 deit.
- g. Karau fini ne'ebe governu distribui ba iha grupu beneficiario sira iha Suku 4 hanesan Suku Eraulo no Suku Goulolo, Postu Administrativu Lete-foho, Suku Estadu no Suku Humboe, Postu Administrativu Ermera Vila ho total 100 cabeças no iha 27 cabeças mate, no hela 73 cabeças mak moris.
- h. Viverus ne'ebe iha Suku Fatuquero distribui ona ba comunidade sira iha Munisipiu Ermera no atu distribui ba Munisipiu seluk hanesan Aileu no Liquica, maibe problema ne'ebe Diresaun ne'e hasoru mak laiha transporte.
- i. Viverus ne'ebe iha Suku Fatuquero nia kuantidade menus, tamba distribu tiha ona ba comunidade sira.

Komisaun Ekonomia no Dezenvolvimentu

4.2. Rekomendasaun

- a. Husu ba ministériu kompetente prepara kondisaun ne'ebe digno ba funsionariu sira ne'ebe reprezeta nasional iha munisipiu, hodi nune'e bele facilita sira nia servisu diak liu tan.
- b. Husu ba ministériu kompetente tau iha konsiderasaun hodi hadia fali kanal irrigasaun Lauala ne'ebe hetan sobu husi mota no durante tinan lima ona la fornese be'e ba natar kuaze hektares 60.
- c. Husu ba ministériu kompetente atu koordena ho empresa CCT Suku Estadu, Empresa CCT Suku Lihu-Railaco no Empresa Kafe Rekmel Suku Eraulo hodi halo jestaun diak ba kafe be'en ne'ebe dois hodi labele fo impaktu ba saúde populasaun sira nian.
- d. Husu ba ministériu kompetente atu koordena ho empresa Grasia ba kriasaun no produsaun manu iha Suku Railaco-Leten hodi halo jestaun diak ba iha manu nia ten ne'ebe mak husik livre hela tun ba rai, wainhira konsumidor sira ba sosa ka visitante sira ba visita sempre horon dois no mos populasaun sira ne'ebe hela besik iha area neba la menta tamba dala ruma empresa husik manu ten direta ba iha mota ne'ebe mak populasaun sira konsumu hela lor-loron.
- e. Husu ba ministériu kompetente tau iha konsiderasaun ba rekrutamentu estensionista foun hodi koloka ba iha suku sira ne'ebe mak ladauk iha estensionista.
- f. Husu ba ministériu kompetente atu kontinua monitoriza no akompanha nafatin ba karau fini sira ne'ebe distribui ona ba grupu beneficiariu sira iha Suku 4, hanesan Suku Eraulo no Suku Goulolo, Postu Administrativu Lete-foho, no Suku Estadu no Suku Humboe, Postu Administrativu Ermera Villa.
- g. Husu ba ministériu kompetente atu kordena ho Empresa CCT hodi kontinua halo rehabilitasan ba kafe ne'ebe tuan ona hanesan halo ona iha suku Goulolo nune'e bele kontinua mos ba Suku seluk iha Munisipiu Ermera.
- h. Husu ba ministériu kompetente tau iha konsiderasaun ba problema ne'ebe mak diresaun Agrikultura no Peskas Munisipiu Ermera hasoru, hanesan laiha transporte wainhira tula viverus hodi distribui ba comunidade sira.
- i. Husu ba ministeriu kompetente atu kontinua aumenta kuantidade viverus iha Suku Fatuquero hodi nune'e bele responde ba iha pedidu comunidade sira nian.

V. Aprovasaun

Komisaun Ekonomia no Dezenvolvimentu

Relatóriu ne'e, hetan ona aprovasaun liu husi reuniaun ordinariu Komisaun nian ne'ebé realiza iha loron quinta-feira, 17 janeiru 2019, 10h30 Oras Timor Lorosa'e, iha sala Komisaun D Parlamentu Nasional. Prosesu aprovasaun hetan partisipasaun husi membrus Komisaun nain 5 ho rezultadu aprovasaun a Favor **5** Kontra **0**, no Abstensaun **0**. Ho nune'e relatoriu fiskalizaun ba Munisipiu Ermera aprovalu.

VI. Lian Ikus

Ida ne'e mak relatóriu vizita Fiskalizaun Komisaun Ekonomia no Dezenvolvimentu iha Munisípiu Ermera no husu autoridade kompetente atu konsidera relatóriu ne'e. Obrigadu.

Prezidente Komisau

Relatora

Deputada Virgínia Ana Belo

Deputada Regina Freitas